



МОНГОЛ УЛСЫН ЗАСГИЙН ГАЗРЫН ТОГТООЛ

МАЛ ХУЛГАЙЛАХ ГЭМТ ХЭРЭГТЭЙ ТЭМЦЭХ, УРЬДЧИЛАН СЭРГИЙЛЭХ САНГИЙН ҮЛГЭРЧИЛСЭН ДҮРМИЙГ БАТЛАХ ТУХАЙ

2005 оны 1 дүгээр сарын 5-ны өдөр

Улаанбаатар хот

Дугаар 2

Мал хулгайлах гэмт хэрэгтэй тэмцэх, урьдчилан сэргийлэх тухай хуулийн 16.2-т заасныг үндэслэн Монгол Улсын Засгийн газраас ТОГТООХ нь:

1. Мал хулгайлах гэмт хэрэгтэй тэмцэх, урьдчилан сэргийлэх сангийн үлгэрчилсэн дүрмийг хавсралт ёсоор баталсугай.
 2. Энэхүү дүрмийн хэрэгжилтэд хяналт тавьж ажиллахыг Гэмт хэргээс урьдчилан сэргийлэх ажлыг зохицуулах зөвлөлийн дарга бөгөөд Хууль зүй, дотоод хэргийн сайд Ц.Нямдоржид үүрэг болгосугай.
 3. Мал хулгайлах гэмт хэрэгтэй тэмцэх, урьдчилан сэргийлэх сангийн дүрмийг орон нутгийнхаа онцлогт тохируулан батлан мөрдүүлэх, цаашид үйл ажиллагааг нь тогтмолжуулахад анхаарч ажиллахыг аймаг, нийслэл, сум, дүүргийн Иргэдийн Төлөөлөгчдийн Хурлын Тэргүүлэгчдийн дарга нарт зөвлөсүгэй.
- Монгол Улсын Ерөнхий сайд Ц.ЭЛБЭГДОРЖ
Хууль зүй, дотоод хэргийн сайд Ц.НЯМДОРЖ

МАЛ ХУЛГАЙЛАХ ГЭМТ ХЭРЭГТЭЙ ТЭМЦЭХ, УРЬДЧИЛАН СЭРГИЙЛЭХ САНГИЙН ҮЛГЭРЧИЛСЭН ДҮРЭМ

Нэг. Нийтлэг үндэслэл

1.1. Мал хулгайлах гэмт хэрэгтэй тэмцэх, урьдчилан сэргийлэх ажилд санхүүгийн дэмжлэг үзүүлэх зорилгоор Мал хулгайлах гэмт хэрэгтэй тэмцэх, урьдчилан сэргийлэх сан /цаашид "Сан" гэх/-г байгуулж, түүний үйл ажиллагааг явуулахад энэхүү үлгэрчилсэн дүрмийг удирдлага болгоно.

1.2. Сан нь мөнгөн хөрөнгийн сан байна.

1.3. Мал хулгайлах гэмт хэрэгтэй тэмцэх, урьдчилан сэргийлэх тухай хууль, Гэмт хэргээс урьдчилан сэргийлэх тухай хууль, бусад хууль болон энэхүү үлгэрчилсэн дүрэмд нийцүүлэн тухайн орон нутгийн онцлогт тохируулан аймаг, нийслэл, сум, дүүргийн Сангийн дүрмийг холбогдох аймаг, нийслэл, сум, дүүргийн иргэдийн Төлөөлөгчдийн Хурал батална.

1.4. Монгол Улсад Гэмт хэргээс урьдчилан сэргийлэх ажлыг зохицуулах зөвлөл Санг мэргэжил, арга зүйн удирдлагаар хангаж, үйл ажиллагаанд нь хяналт тавина.

Хоёр. Сангийн удирдлага, зохион байгуулалт

2.1. Сан нь аймаг, нийслэл, сум, дүүргийн Гэмт хэргээс урьдчилан сэргийлэх ажлыг зохицуулах салбар зөвлөл /цаашид "Зохицуулах салбар зөвлөл" гэх/-ийн дэргэд ажиллана.

2.2. Сангийн удирдах байгууллага нь Сангийн зөвлөл байна. Сангийн зөвлөл нь дарга, нарийн бичгийн дарга, орон тооны бус гишүүдээс бүрдэнэ. Гишүүдийн тоо 5-9 байна.

2.3. Аймаг, нийслэл, сум, дүүргийн иргэдийн Төлөөлөгчдийн Хурлын Тэргүүлэгчдийн дарга бөгөөд Зохицуулах салбар зөвлөлийн дарга нь Сангийн зөвлөлийн дарга байна.

2.4. Сангийн зөвлөлийн нарийн бичгийн дарга, гишүүдийг тухайн аймаг, нийслэл, сум, дүүргийн иргэдийн Төлөөлөгчдийн Хурлын Тэргүүлэгчдийн хурлаас томилно.

2.5. Сангийн өдөр тутмын үйл ажиллагааг Сангийн зөвлөлийн нарийн бичгийн дарга эрхлэн гүйцэтгэнэ.

2.6. Сангийн зөвлөл дараахь бүрэн эрхтэй байна:

2.6.1. Сангийн үйл ажиллагаа болон сангийн хөрөнгөөр санхүүжих арга хэмжээний жил, улирлын төлөвлөгөө, тэдгээрийн төсвийг хэлэлцэн батлах;

2.6.2. Сангийн хөрөнгөөр санхүүжих төсөл, хөтөлбөрийг сонгон шалгаруулах;

2.6.3. Иргэн, аж ахуйн нэгж, байгууллагаас өөрийн өмчлөл, эзэмшилд байгаа мал сүргийг гэмт халдлагаас хамгаалах талаар гаргасан санал, санаачилгыг дэмжиж, хөдөлгөөн өрнүүлэх;

2.6.4. Сангийн хөрөнгөөр санхүүжиж байгаа арга хэмжээ, төсөл, хөтөлбөрийн явц, үр дүнгийн тухай тайланг хэлэлцэн үнэлэлт, дүгнэлт өгөх;

2.6.5. Сангийн зөвлөлийн дарга болон нарийн бичгийн дарга, гишүүдийн ажил, үүргийн хуваарийг батлах;

2.6.6. Сангийн улирал, жилийн ажлын тайланг хэлэлцэх.

2.7. Сангийн зөвлөлийн дарга нь Сангийн үйл ажиллагааг удирдан зохицуулж, сангийн хөрөнгийг энэ журмын 2.6.1-д заасны дагуу баталсан төлөвлөгөөнд заасан арга хэмжээнд зарцуулна.

2.8. Сангийн зөвлөлийн дарга нь Сангийн хөрөнгөөр санхүүжүүлж байгаа арга хэмжээ, төсөл, хөтөлбөрийн биелэлтэд хяналт тавьж, шаардлагатай гэж үзвэл санхүүжилтийг нь зогсоож, Сангийн зөвлөлийн хуралдаанаар уг асуудлыг хэлэлцүүлэн шийдвэрлүүлнэ.

2.9. Сангийн зөвлөлийн үйл ажиллагааны үндсэн хэлбэр нь хуралдаан байх бөгөөд улиралд нэгээс доошгүй удаа хуралдана. Зөвлөлийн гишүүдийн гуравны хоёр нь оролцсоноор хуралдааныг хүчинтэйд тооцно.

2.10. Сангийн зөвлөл асуудлыг тухайн хуралдаанд оролцсон гишүүдийн олонхийн саналаар шийдвэрлэж, тогтоол гаргана. Сангийн зөвлөлийн тогтоолд дарга, нарийн бичгийн дарга гарын үсэг зурна.

2.11. Сангийн зөвлөлийн хуралдааны явцын тухай тэмдэглэл хөтөлж, дарга, нарийн бичгийн дарга гарын үсэг зурна.

2.12. Сангийн зөвлөл нь тухайн шатны иргэдийн Төлөөлөгчдийн Хурлын тамга, тэмдэг, албан бичгийн хэвлэмэл хуудас хэрэглэнэ.

2.13. Тухайн аймаг, нийслэл, сум, дүүргийн Засаг даргын Тамгын газар Санг ажиллах нөхцөлөөр хангана.

2.14. Сангийн хөрөнгийг банкинд тусгай дансанд байршуулна.

Гурав. Сангийн хөрөнгийг бүрдүүлэх, зарцуулах

3.1. Сангийн хөрөнгө нь гадаад, дотоодын иргэд, байгууллага, аж ахуйн нэгжийн тусламж, хандив болон хуулиар хориглоогүй бусад эх үүсвэрээс бүрдэнэ.

3.2. Сангийн хөрөнгийг дараахь үйл ажиллагаанд зарцуулна:

3.2.1. Мал хулгайлах гэмт хэргээс урьдчилан сэргийлэх хууль тогтоомжийг сурталчлах, тайлбарлан таниулах, энэ төрлийн гэмт хэргийн шалтгаан нөхцөлийг судлах, арилгах;

3.2.2. Мал хулгайлах гэмт хэрэгтэй тэмцэх, урьдчилан сэргийлэх үүрэг гүйцэтгэж байгаа хүмүүсийг урамшуулах;

3.2.3. Мал хулгайлах гэмт хэрэгтэй тэмцэх, түүнээс урьдчилан сэргийлэх ажилд идэвхтэй оролцсон иргэн, аж ахуйн нэгж, төрийн болон төрийн бус байгууллагыг шагнах, урамшуулах.

3.3. Сангийн хөрөнгийг энэ дүрмийг 3.2-т зааснаас өөр зориулалтаар зарцуулахыг хориглоно.

Дөрөв. Сангийн тайлан, бусад зүйл

4.1. Сангийн орлого, зарлагын тайлан мэдээг сум, дүүрэг бүр улирал бүрийн сүүлчийн сарын 25-ны дотор гаргаж, аймаг, нийслэлийн Зохицуулах салбар зөвлөлд; аймаг нийслэлийн Зохицуулах салбар зөвлөл улирал бүрийн дараа сарын 5-ны дотор Монгол Улсад Гэмт хэргээс урьдчилан сэргийлэх ажлыг зохицуулах зөвлөлд тус тус ирүүлнэ.

4.2. Сангийн бүрдүүлэлт, зарцуулалтад тухайн аймаг, нийслэл, сум, дүүргийн иргэдийн Төлөөлөгчдийн Хурал нь орон нутгийн мэргэжлийн хяналтын байгууллагаар жил бүр баримтын шалгалт хийлгэж байна.

4.3. Аймаг, нийслэлийн Сангийн зөвлөл нь Монгол Улсад Гэмт хэргээс урьдчилан сэргийлэх ажлыг зохицуулах зөвлөлд; сум, дүүргийн Сангийн зөвлөл нь аймгийн Зохицуулах зөвлөлд тус тус хагас, бүтэн жилээр үйл ажиллагаагаа тайлагнана. Тайлагнах журмыг Монгол Улсад Гэмт хэргээс урьдчилан сэргийлэх ажлыг зохицуулах зөвлөлийн дарга батална.

4.4. Сангийн зөвлөл нь үйл ажиллагааныхаа тайланг энэ дүрмийн 4.3-т заасан байгууллагад тайлагнахаас гадна тухайн шатны иргэдийн Төлөөлөгчдийн Хурал болон тухайн орон нутгийн иргэдэд жил бүр мэдээлнэ.

4.5. Гадаад, дотоодын иргэд, байгууллага, аж ахуйн нэгжээс Санд оруулсан тусламж, хандивын хөрөнгийн зарцуулалтын тайланг шаардлагатай бол тухайн иргэн, байгууллага, аж ахуйн нэгжид хүргүүлж болно.